



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 7



US asoshi tsükchir tulutibaji Iran lir: Kamala Harris

VOL. XXII ISSUE NO. 02 (ADOK 02)

DIMAPUR

YANGTEPNÜ (THURSDAY)

MONGPUTENI (OCTOBER) 10, ₹ 5.00

RIIN mapa tenzüksüla: Ao Senden

Dimapur, October 9, 2024 (TYO): Nagaland State nung lisopurtem taginübatem aser maitsü kümzüka ayutsü atema Registration of Indigenous Inhabitants of Nagaland (RIIN) akangakanga inyaksüla ta Ao Senden-i metetdaksüo.

Lisopur masürtem atema December 1, 1963 cut-off date ser iba mapa inyaksüla. Nagaland state ya Arria 371A agi kümzüka lir anungji iba ya ali tashi state nung lisopurtem kümzüka ayutsüla, ta pamoki ashi.

Anungji Nagaland state sorkari RIIN mapa inyaksü tenzükba onoki pelashishia

agizüker ta Ao Senden-isa shiogo. Dimapur, Chumoükedima aser Niuland district tem atema inner line pass dak sendakba nung state sorkari December 1, 1963 aser November 21, 1979 anogo ana latetba meyipa repringshitsü mepishir ta Ao Senden Tir Marsanen Imsong aser Tongti Tezülur Imtipokiyim nati sangdong ka nung ashi.

Nagaland nung lisopurtem bendanger dang nungi kümzüka ayutsü atema inner line pass amshir, anungji iba atema December 1, 1963 cut-off year dang amshitsüla ta Ao Senden mendenpurtemisa ashi.

Mizo kentener Bethsy aser kinungbo na nem interim bail melar

Guwahati, October 9, 2024 (Agencies): Gauhati High Court (GHC)-i Mizo gospel singer Bethsy Lalrinsangi aser la kinungbo evangelist Lalhriatpuia Chawngthu na nem interim bail agütsüo.

Assam nung tashiyim agi tamangba yimsü meyipdaksüba atema tena dak tai tonglokja lir.

Kokrajhar district nung aliba Mount Olive School nung tenati gospel meeting ka ayonga agi aser idangji tanurtem tamangba yimsü melendaksü ta tai tonglokja lir.

Rashtriya Swayamsevak Sangh (RSS) züngsem kari Kazigaon police station nung FIR

ka benok. GHC nung Justice Arun Dev Choudhury-i Mongulbarnü tena nem interim bail temelaba agütsü aser anogo 10 tsüingda tenati Assam police den ajurutepe osang sangoktsütsü tetuyuba agütsüo.

Tesüiba nung tenati Kokrajhar District Court-i oa "Child Conversion" onük atema noktak. Ajsüiaka iba mapang tena indang interim bail magizük.

Bethsy Lalrinsangi aser la kinungbo Lalhriatpuia Chawngthu na anema ken o benokba ajanga o atsüteper aser Assam nung tamangba yimsü nüjiso atema tebilemstütem lemsatepa arur.

India sorkari Naga yimten tebilemstü atema tasü itta jembitsüla: KG Kenye

Kohima, October 9, 2024 (TYO): India sorkari Naga yimten tebilemstü atema tasü itta kechi akoktsü mesüra makoktsü ashitsüla ta Nagaland government spokesperson & cabinet minister K G Kenye-i ashi.

Bodbarnü Delhi nung Centre aser NSCN-IM tsüingda olemtep tenzükba atema Kenye-i osangbener dang iba ya ashi.

Tanü Chief Minister Neiphiu Rio-i anir cabinet senden ka amen aser aser iba sülen osangbener den jembidang "sorkari tajungtiba atema bilemer aser tang tashi nung telok ana tsüingda anendaka aliba onüktem jembia aotsü" ta Kenye-i ashi.

"India sorkari iba tebilemstü yamai anendaka meyui tasü itta kechi akoktsü aser tamakoktsü ashitsüla. Centre-i settlement ka dang alitsüla ta bilemra, parnok nem agüja aliba onük ajak single document ka nung lokteptsüla" ta pai ashi.

State sorkari Independence Day onük jembidang "NSCN-IM aser Working Committee of Naga National Political Groups (WC, NNPGs) den Framework Agreement 2015 aser Agreed Position 2017 nung ajemdaker olemtep tenzüksüla" ta ashiba Kenye-i nenshia metetdaksü. NSCN-IM-i Naga nunger atema wako aser temzüng balaka meshiba magizüker aser iba ajanga lemtet ka magiteter. Naga olemtep nung Centre atema taoba Interlocutor aser taoba Nagaland Governor R N Ravi-i October 30, 2019 nü olemtep tembangba metetdakja liasü.

Naga olemtepertemi parnoki shidangba yimjak nung sayutsüla aser senso shiai documents repranger pei pei tebilemba lemsateptsü. Yamaji asü nung dang senso ajak angatetepa single document ka kümer tekaratiba nung yimten latettsü,

ta Minister Kenye-i ashi. "Onoki tongteta aliba ka agientsü mesüra agreements magizüksü ta asüba tebilemba kecha mali. Iba atema document tasen kecha mali" ta pai ashi.

Tanü cabinet senden nung Register of Indigenous Inhabitants of Nagaland (RIIN) atema jembitep ta Kenye-i ashi.

Non-Naga kin pezü- Kuki, Kachari, Mikhir aser Garo nunger nem indigenous status agütsütsü atema December 1, 1963 nung ajemdaker RIIN maparen tenzüksü ta pai ashi.

Kin pezüi enumeration nung shilem magitsü ta asübaji parnok takoksa dang asütsü kechiyong iba mapa inyaka aotsü ta Kenye-i ashi.

Nagaland state makümdang arua aliba non-Naga aser non-tribal communities nem Permanent Resident Certificate agütsütsü aser parnok asoshi Inner Line Permit menüingdaksü ta paisa shisem

Kohima bus gari lendong nung kaketshir 20 yiru

Kohima, October 9, 2024 (TYO): St. Joseph College Jakhama kaketshirtem amenba bus gari ka tanü National Highway-2, Kohima-Mao nung tsükok.

Gari mashii aniba ajanga iba lendong nung kaketshir 20 aser driver dena yiru.

St. Joseph College

kaketshir 20-30 shi amenba bus gari tanü nikongdang 2:00 ako meta highway lenüpkoklen feet 40 shi ia tsükok. Dimori Cove Kigwema anasa bus gari jagi tanga gari ka ajateta aotsü merangdang lendongji atalok ta osang angazüker.

Iba lendong nung kaketshir

20 shi yiru aser parnok 8 tashi kanga mejungi yirur mozü ki balala nung anepaludar. Külen iba osang zülü tashi nung bus driver ji süchia aoba ano shia maru lir.

Iba lenmang nung süirtem aser Zakhama army-i mapang shitak nung teyirurtem Army Hospital-i anir oa anepalu.

Longsa nung yimsüsür Wb. Imlikokbar kibong 'Mera Nija' benjong ayongzük



Mokokchung, 9th Oct (TYO): 'Mera Nija' aluro benjong ya Chungliyimti nungi benshia aruba sobaliba ka sürnung joko yim aika iba inyakyim sama-a aoba mapang ka, Longsa yimtiba nungi yimsüsür Mr & Mrs. Imlikokba Longkumer GB, par kibongi October 9, 2024 nü 'Mera Nija' aluro benjong tulu ka ayongzüka mungogo.

'Mera Nija' ya Chungliyimti nungi munga aruba sobaliba ka lir. Iba ya aluyimba dak sentakba aser yimer nijai meraketsüba benjong ka lir. Par tsüraburtemia yimer koka arua lir, anungji, tsürabur tsüngsü nung jajatsü aser par kibongia jangra aliba agi

iba benjong ya ayongzükogo, ta benjong kibur yimsüsür Imlikokba Longkumer-i osangbenertem den jembidang metetdaksü.

Mera Nija dak sentakba kar ashidang, Tsüingremmung nung nashi ka aser ak ka ta tepseta yongyatsü, Moatsü nunga yamaji nashi ka aser ak ka ta tepseta yongyatsü aser Christmas mapanga nashi ka aser ak ka ta tesepa yongyatsü. Iba sülen 'Aontem Nija'ogo. Item jenjang ajakji ajangtet nung dang 'Mera Nija' benjongji ayongteter, ta benjong kiburi metetdaksü.

Mera Nija nung adener kibong shia nem 'shiwa' (shi telong kaka)

agütsütsü, iba den tarur nisung shia nem (akoa) 'shitu' kaka (shimelang pungu-ngu keter) agütsütsü aser inüji chiyungba mapang aosu nung shimelang asem (shitsü ana den poknung tejang ka densema) inoktsütsü. 'Shiwa' aser 'Shitu' jibo pei kidangi bener oa soa achitsü atema bener yoker. Iba ama inyakba ajanga yimera aser kibura temaotsü agir ta tsüraburtemi jembia aruba pai lemsatep.

"Iba benjong atema yaküm aontem nija agüja küptokogo aser taküm kibong 650 jaoka pelatepa amunger", ta paisa shisem.

Mera Nija ayongba nung ya anembong tulu sentaka lir, tebang temeli azüoktsüla, apu-ani tsüingta aser achiajamba ajak asüngtettsü. Küm tesadang tashi yamaji asüngteta arur külen aluro ita nung ano balaka anembongtsü, ta benjong kibutsüla Wt. Sademkala Pongen-i ashi. Iba benjongi jaoker ajak dang anogo asem jilia (yimnü ta asüandang) osang abangtsü. Iba tetezü benjong kibur anembongba ama tejaokertemjia anembongersa arutsü ta tsüraburtemi yamaji

benshia aru, ta lai ashi.

Benjong ayonger kiburji anembong tesashi lir, kechiyong Mera Nija ya tasüngtet aser temeshi mapa ka inyaker asünung yamaji benshir. Iba benjong ayongba ya tongtibangsa chirnur sobu abensatsüba den parnok nem temoatsü lenmang yanglua toktsütsü asoshi lir, anungji, kanga asüngteta aru aser ibai kinungbu künadi jangraba mapa ka inyaker, ta lai metetdaksü.

Aor sobaliba tajung liaka tanü aikadi temulung magütsür. Talisa iba ama mapa yabo rongsen tulu liaka nai alu meranga meyimra mesütet aser alu meranga yimaka rongsen makara benjong mekokteter. Aji süaka, Tsüingremi yimli tulu agüja aser kinungbu nem shisatsü den temoatsü tulu agütsübayong ya inyaksü mulungtetdaksü, ta laisa Tsüingrem tenüng sanga ashi.

Iba nung ya temoatsü tulu sentaka lir ta amanga Longsa Mejensanger Putu nung par kibongi mezüngbuba jenjang ka tenzükba yutsür, anungji, lanu putui iba mapa ya jangra inyaksü lai ayongzük.

Alu kiburi alu tulu yima meranga inyakba den talangka anembonga aru aser Mera Nijai jaokertema yamaji asüngteta ata, aser iba benjong nung yimsüsürtemi anir nütsüng nübu medema arua aluro maparen ajak meraketa amungba agi 'Mera Nija' ta jatet. Iba benjong ya aluyimba dak sentakba nungbo tulutiba lir aser ibai temoatsü meshia amungba benjong ka lir, ta tsürabur Wb. Kazütemjen-i Mera Nija ratettsüandang metetdaksü.

Tanü putu nung 'Mera Nija' benshiba ajanga konang tutushi anguba den iba ajanga asen Aor sobaliba wazüka ayur, meranga inyaksü ajungshir, yimer rongnung alu ayimtsü ajungshir, ibai temoatsü meshiba mapang ka aser pei akaba yimer den lemsatepbatemji tajangzük asütsü, ta benjong daki arur ka den iba osangbeneri jembidang pai ashi.

Tanü nijai arur telok asem küma lemsar aluroba maparen inyaka liasü aser tsük ajak agi tin 800 shi aro. Teburtemi miyo tajung miyoo aser tetsürtemi ola tajung agüja tanganütsüka aluro wadang inyaka liasü.

Mokokchung DPDB senden nung trauma centre atema jembir



Speaker, NLA & Chairman DPDB Mokokchung, Sharingain Longkumer-i October 9, 2024 nü Deputy Commissioner, Mokokchung indang Conference Hall nung DPDB Mokokchung senden nung jembidang tangokba noksa nung angur.

Dimapur, Mongputeni/Oct. 09 (TYO): Mokokchung District Planning & Development Board ita shia amenba October 2024 atema tanü (October 9, 2024) Deputy Commissioner, Mokokchung indang Conference Hall nung Speaker, NLA aser Chairman, DPDB Mokokchung, Sharingain Longkumer lenisüba nung mena liasü.

Senden nung Department of Health and Family Welfare ajanga capital assets indang osang agiba mapang district nung Trauma Centre kata maliba onük Sharingain Longkumer-i benoka liasü.

Gari aser senzusemponger

tali akumer asünung, alangba, gari lendong ajuruba amala nung yirur asoshi teyari agütsüsü atema trauma centre kanga nungdaker, kechiaser mapang shidak nung temang anepaluba ajanga takum kumzüksü, ta pai ashi.

Tarutsü nung mapa kuma inyaka aotsü atema pai department dang trauma centre atema proposal agütsüsü ashi.

District nung tzü agi anünga tebilemstü atema lenmang bushitettsü mechi Mokokchung DPDB chairman-i PHED Department dang water sources nung timtem ajuruba aser temelen lenmang kar

bushia taruba senden nung osang agütsüsü ashi.

Department of Art & Culture, Urban Development, Electrical Division, Taxes, Health & Family Welfare, District Institute of Education Training, Land Record & Survey aser PHED ajanga iba senden nung capital assets osang agüja liasü.

Chungtia yimdak Multi-Utility Complex ka yanglutsü atema ken o benoka jembir agizük aser mera agitsü atema sorkar dangi yok.

Iba senden nung Department of Social Welfare ajanga PowerPoint presentation agüja liasü.

Holistic Progress Card atema workshop agiogo

Dimapur, Mongputeni/Oct. 09 (TYO): Holistic Progress Card mapa kuma inyaka aotsü atema anogo ana workshop PARAKH ajanga SCERT, Nagaland den lungjemer October 8 & 9, 2024 anogotem Conference Hall-3 SCERT, Kohima nung ayongzüka liasü.

Iba sentong nung shisalen sayur ya PARAKH, NCERT nungi Jaya Bhardwaj aser Bidisha Majumder liasü.

Iba workshop tenzükba

sentong nung Kevirale-ii Kerhuo, Director SCERT Nagaland ajanga iba workshop indang nükjidong lemsatop aser Prof. Indrani Bhaduri, CEO PARAKH ajanga virtual yimya nung iba sentong indang lemsatopa liasü.

Iba workshop nung shilem agirtem ya Directorate of School Education, Samagra Shiksha, NBSE, SCERT, DIETS aser district ajanga nungi school tesayurtem liasü.

Iba workshop nung shilem agir ajak agi nisung 107 liasü.

Workshop nung NEP 2020 aser NCF 2023 dak rangloker HPC indang jembir, Foundation, Preparatory, Middle aser Secondary stage tem tesayuba balala agütsü.

State nung kaket reju ketdangsurtem asoshi iba workshop ya tenük lapokba mapang ka liasü, koba Nagaland nung HPC mapa kuma inyaktüsü asoshi terenemshiba ka amai liasü.

Himroo: Sü atakba yimya balaka



Asüngba Ao

Dimapur, Mongputeni/Oct. 09 (TYO): Puti otsü aketba monuments balala aliba den külemi Maharashtra nung Aurangabad yimti ya Himroo ta ajaba weaving technique balaka amshiba asoshi kanga jangja meteta lir, koba Persia nung tenzük.

Himroo ta asüba ya Persia nung 'Hum ruh' ojang nungi adok aser iba tetetzü mesükteper. Ibai Kum khwab melen atakba lir, koba akhi mapang 'golden' aser 'silver threads' amshia chubar kibong asoshi taka amshi.

Iba yimya ya Mohammed Tughlaq yimsüsüba mapang Delhi nungi pa yimli yimtiba Daulatabad, Aurangabad-i belen dang bener aru. Iba mapang

nungi tenzükba aso pongu buba kasa yimya amshia süoshi ataker, koba machine mamshi teka kisüing agi ataker.

Aurangabad Himroo factory nung Nagaland nungi osangbener den sensaksemba mapang Imran Ahmed, shiba aso pongu buba iba yimya amshir, pai ashiba agi, Himroo handlooms ya sobaliba nung tera yanga aliba mapa ka lir, koba dangalen mangur.

Danga handlooms memesük, iba yimya ya tang India nunga Aurangabad nung dang amshir.

Himroo metre ana yanglutsü atema anogo toku agir aser ibaji metre ka nung sen 3500 agi ayoker, ta pai ashi.

Iba oset ya India nung

kisüing masü saka alima tesem ajanga nung ayongtsü atema pai social media sapang tem küm ka shi amshia arur, ta Imran Ahmed-i ashi.

Himroo nung Persian design amshir aser tereprangtsü khenyongi balaka lir, ta pai ashi.

Aurangabad nung yangluba Himroo ya style aser design nung khenyongi balaka lir, aser iba yongji nüburtemi kanga aginer.

Aiben iba dang dying art ta ajar, aser Himroo weaving asendenshitsü aser kasa mapang tajemzükba jenjang nung aliba tetsür nem training agütsüsü mangdang lir, ta Imran-i ashi.

Item tetsürtem yagi kanga junga angazüka Himroo takum yutsür, ta paisa ashi.

Nagaland Angh-i Dussehra benjong salem lemsatop

Dimapur, Mongputeni/Oct. 09 (TYO):

Nübur ajunga dangi tepela aser yimchiyimjung Dussehra benjong salem abener. Iba benjong yagi tashi, tepela aser takokba bener arujangba, kechiaser iba benjong ya temenen madak tajungi takok anguba benjong lir, ta Nagaland Angh La Ganesan-i ashi.

Dussehra tanüla agi ajungmesoa nenoki tayongzüikba balala nung takok angutsü aser Lord Rama aser goddess Durga temoatsü agi nenok takum süngjangma, ta ashi.

Assenoki iba benjong tulu amungdang tammang madak tesangwa agi takok ngua takum tasen tenzükti, ta paisa ayongzük.

GNM & FHW/ANM azungtsü nübu shimogo

Dimapur, Mongputeni/Oct. 09 (TYO):

Academic session 2024-25 atema GNM & FHW/ANM training agitsü asoshi nübu shimba department indang website nung inokja lir, ta Directorate of Health & Family Welfare, Nagaland sangdong ka ajanga ashi.

Anungji candidate temi department indang website www.nagahealth.nagaland.gov.in nung reprangtetsü aser Directorate of Health & Family Welfare, Nagaland, Kohima indang notice board nunga yuja lir, ta sangdong ajangasa ashi.



Dimapur Govt College Alumni Association purtemi Dimapur Govt College nung azüngertem rongnung teyari nungdakba Kaketshir 7 shimteta Scholarship agütsüba sentong ka tanü college nung agiogo. Iba scholarship nung nisung shia nem küm ka asoshi sen Rs 6000 agütsür. Yaküm küm-a DGCAA purtemi kasa scholarship ya kaketshir 12 nem agüja liasü. Noksa nung iba scholarship angur kaketshirtem den Alumni aser tesayurtem kar angur. (Dimapur, Oct. 09, 2024.)

Mokokchung DC office nung enumeration exercise alitsü

Dimapur, Mongputeni/Oct. 09 (TYO):

Nagaland Commissioner ajanga sangdonga aliba ama, IIC, Permanent Residence Certificate (PRC) agütsüsü atema Garo, Kuki, Kachari & Mikir (Karbi) aser Nepali/Gorkhas nungi jakzüka Mokokchung District nung alir atema enumeration exercise alitsü, ta Deputy Commissioner, Mokokchung, Thsuvisie Phoiji-i sangdong ka nung ashi.

Garo, Kuki, Kachar, Mikir (Karbi) nung ya Nagaland nung December 1, 1963 masüidang arua alir asütsüla aser Nepali/Gorkhas ya Nagaland nung December 31, 1940 masüidang arua alirtem asütsüla.

Iba enumeration ya Office of the Deputy Commissioner, Mokokchung ajanga yimtsüing/jila sasep nung agüja aliba proforma nung agitsü aser enumeration sheet nungya village council chairman/municipal council chairman, pei aliba tesem nung GB, Area Administrative Officer, Garo, Kachari, Kuki, Mikir aser nung

Chairman/President/ Representative aser district tem indang Deputy Commissioner temi countersigned asütsüla, ta ashi.

Final enumeration sheets copy ajanga Commissioner, Nagaland ajanga Home Department, Nagaland nem agütsüsüla aser iba sülen telemtetba agitsü atema maneni Cabinet nem agütsüsü.

Iba enumeration exercise atema mapang telemsa yamai alitsü: October 1, 2024 nü osang sangdongtsü, October 18-31, 2024 anogotem charge officers, Supervisors aser Enumerations training agitsü, November 1, 2024 nungi January 31, 2025 tashi enumeration exercise alitsü.

Draft list ya February 15, 2025 nü sangdongtsü aser temotongshitsü aser temelenshi lira February 17 nungi March 17, 2025 tashinung inyaktüsü, March 18 nungi April 21, 2025 tsüngta claims & objections ajak bentetsü aser enumeration indang final publication ya May 6, 2025 nü sangdongtsü, ta osang ajanga ashi.



October 09, 2024 nü Bengaluru nung aliba Kempegowda International Airport nung High Commissioner of India to Maldives-i Maldives Tir, Mohamed Muizzu aser pa kinüngtsü, Sajidha Mohamed na agizükdang tangokba noksa nung angur.

Union Cabinet-i PMGKAY scheme 2028 küm tashi atsülanger

New Delhi, Mongputeni/ October 09 (Agencies): Bodhbarnü Centre sorkari Pradhan Mantri Garib Kalyan Anna Yojana (PMGKAY) densema sorkar schemes balala kübok 2028 küm tatembanglen tashi jang tajung (free fortified rice) angati agütsütsü asoshi mapang atsülanger sangdongogo.

Iba mapatong ya nübortem rongnung 'anaemia' aser micronutrient deficiencies ajema kümdaktsütsü nükjidong nung lir. Iba telemtetba agiba ajanga Centre sorkar senpong nungi sen crore 17,082 dak tali indoktsü.

Bodhbarnü osangbenertem den jembidang Union Minister, Ashwini Vaishnav-i, "Tanü Cabinet senden nung Pradhan Mantri Garib Kalyan Yojana (PMGKAY) aser tanga welfare schemes kübok July, 2024 nungi December, 2028 tashi Fortified Rice angati agütsütsü telemtetba agiogo. Iba ya ajanga nübortem rongnung anaemia aser micro-nutrient deficiency ajema akümtsü. Iba sentong ajanga senpong nungi sen crore 17,082 indoktsü aser ajakji Centre sorkari indoktsü," ta metetdaksü.

2022 küm April ita nung Cabinet Committee on Economic Affairs (CCEA)-i India tesem ajaklen shilem lemsar jang tajung angati agütsütsü aser 2024 küm March ita nungbo linük tesem ajak ayimjemtsü asoshi telemtetba agia liasü. Iba mapatong takok ngua tambangogo aser tang iba jang

ya sorkar schemes balala ajanga agütsür.

2019 küm nungi 2021 küm tashi agiba National Family Health Survey (NFHS-5) ajanga bushitetba agi, India nung anaemia ya tebilemstü onük tuluka lir, aser iba timtem yagi tanur-tain ajak kongshir. Iron deficiency dak alia Vitamin B12 aser folic acid ama vitamin aser minerals agi meperiba agi nübortem temang nung mejungi kongshir.

India nung nüsüng shilem 65 atema jang ya tongti chiyungtsü ka lir, anungji anaemia aser micronutrient malnutrition ajema kümdaktsütsü nükjidong nung 'fortified' jang angati agütsür.

Fortified jang nungji Fortified Rice Kernels (FRK) inoksemer, kechiyong iba nungji micronutrients (Iron, Folic Acid, Vitamin B12) densema lir.

Union Minister, Vaishnav-isa, jang tajung agütsütsü asoshi FRK tendangtsü atema NABL lab 27 amshitsü aser vitamin-mineral premix tendangtsü atema NABL lab 11 amshitsü. Iba mapatong asoshi supply chain atema sen crore 11,000 indoktsü, ta metetdaksü.

Union Cabinet-isa Gujarat kübok Lothal nung National Maritime Heritage Complex ka amenoktsü lemtetogo. Ibaji ajanga mapa 22,000 adokdaksütsü.

NMHC ajanga lisopurtem, raliwalirtem, state semdangertem, research agirtem, shisashirtem, sorkar tentettem, shisaliok rejutem, sobaliba organizations,

environmental aser conservation telok aser businesses nungi stakeholders tajangzük angutsü.

NMHC atema architecture firm Architect Hafeez Contractor-i asalentong ajak renemogo aser mezüngbuba shilem inyaksü atema Tata Projects Ltd shimogo.

Mezüngbuba shilem nungji NMHC museum ka asütsü aser iba nungji Indian Navy & Coast Guard gallery ka densema gallery trok alitsü. Iba project tanabuba shilem nung tzüyimkümlen aliba state tem indang pavilions amenoktsü, hospitality zone ka, akhidang aliba Lothal yimti noksa, Maritime Institute ka den hostel aser park pezü yanglutsü.

"Tanü Cabinet-i Gujarat kübok Lothal nung National Maritime Heritage Complex ka amenoktsü atema telemtetba agiogo. Iba ya tzüyim nung asen senmang tajung aliba sayatsü nükjidong nung amenoker aser iba ya alima nung maritime heritage complex tulutiba asütsü," ta Union minister-isa metetdaksü.

Union Cabinet-isa Rajasthan aser Punjab na nung arrtsülen aliba tesemtem nung gari lenmang kilometer 2,280 yanglutsü telemtetba agiogo.

"Ato kilonser Modi-i arrtsülen aliba tesemtem nung terenlok mapatem inyaksü kanga tongtibang ta benoka liasü. Tanü cabinet-i Rajasthan aser Punjab na nung arrtsülen sen crore 4,406 indoka gari lenmang kilometer 2,280 yanglutsü agizükogo," ta Vaishnav-i metetdaksü.



October 09, 2024 nü Srinagar nung Jammu and Kashmir National Conference (JKNC) Tir, Farooq Abdullah-i Jammu & Kashmir Congress Tir, Tariq Hameed Karra aser tangartem ajurudang tangokba noksa nung angur. J&K Assembly election nung NC aser Congress teloktepi takok nguogo.



Changtongya Town Baptist Arogo

P.O.Changtongya, 798613, Mokochung: Nagaland, India.

Email: ctbaoffice16@gmail.com

Changtongya Town the 2nd October 2024

11th - 13th October 2024 Home Coming Revival sentong nung atentsü pelashishia jaoker

Temeim Changtongya Town sangertem,

Tamasa ajak dangi Yisu Khrista temeim salem abener. Tanü iba sangdong ajanga Changtongya Town sanger ajak dang nungdak ka lemsateper. 2022 küm Changtongya Town Baptist Arogo nung Laishir senden akadang Tsüngremi Laishir mulungjang nung Home Coming Revival sentong ka akatsü atema jemb. Iba osangji Arogo den tongtepratep aser Arogoia mulunga 11th -13th October 2024 anogo akatsü sentong yanglur Sarasadema atadagi. Iba sentong ya Changtongya Town Baptist Arogo nung telidakup aser Changtongya Town sanger bendanglen prokshia oa alirtem ajak asoshi lir.

Iba ama sentong ya teti mekatetsü, mapang ka nung ken dang katetba sentong asünung, talisa Changtongya Town sanger bendanglen prokshia oa alirtem aser ano oda Changtongya Town nung ken danga lidanger aortem ajak medema arua atentsü Arogoi aser Lashirtemi pelashishia jaoker. Nisung kar tanendak maka koda masür lira agüja aliba contact number 9077885730 nung tongtepratepsü mepishir, nenok asoshi tajungtiba renema lir.

Nisung shia kija taküm, kibong aser lokti nung nungdak aika lir, itemji asenok asoshi teti inyaka aotsüba nungdaktem, saka Home Coming Revival sentong yabo taküm nung ken anga ajuruba sentong ka asütsü akok. Anungji nübortem ajak arua iba sentong nung tena temoatsü angutsü Sarasadema atar.

Kibuba nung,

(REV. TEMSHI PASTOR) Changtongya Town Baptist Arogo

J&K nung kiralongrartemi sepaia ana puer ao

Srinagar, October 09 (Agencies): Mongolbarnü Jammu & Kashmir kübok Anantnag district nung kiralongrartemi Territorial Army ana puer aoba sülen sepaitemi parnok bushi tenzuka liasü, ta army osang ka ajanga metetdaksü.

Sepai ana rongnungji tasü mang kabo nguogo aser temang nungji injang zübo liasü. Mongolbarnü Anantnag district kübok Kokernag area nung kiralongrartemi sepaia anaji puer oa liasü. Sepai ka tasü mang nguogo aser kabo jena oteta meyipa aru.

Sepai ana puer aoba osang angashiba sülen Indian Army aser Jammu & Kashmir Police nati senteper iba region nungji tena bushi tenzuka liasü.

Srinagar nung amenoka aliba Indian Army Chinar Corps-i X ajanga, "Intelligence osang nung

ajemdaker Indian Army-i Jammu and Kashmir Police aser tanga agencies ayongsemer October 8 nü Kokernag kübok Kazwan arem nung kiralongrartem mita ao. Aonung piyong mita ao, kechiyong Territorial Army ana rongnungji kabo meyipa maru," ta metetdaksü.

Yaküm August ita nunga Kashmir kübok Kulgam district nung sepaia ka sodi agia aliba mapang sama, saka tesülen police-i angu.

2019 küm nunga sepaia, Yasin Bhat par kidang lia kiralongrartemi pa puer aotsü merang, saka pa jena oteta liasü.

Tesüiba küm 8 tsüngda Kashmir nung kiralongrartemi sepaia pongu puer oa tepsetogo. Sepaitemji teimbaka Shopian aser Kulgam area nungi puer oa liasü.

2022 küm nunga Budgam nung sepaia ka puer oa liasü.

Haryana election nung party-i tamakok anguba asadangdar: Rahul Gandhi

New Delhi, October 09 (Agencies): Congress MP aser Lok Sabha nung Opposition lenir, Rahul Gandhi-i Jammu & Kashmir nung nübortem party yariba atema tenüngsang agütsüba den külemi Haryana nungbo party-i tamakok anguba kuli asadangdar, ta metetdaksü.

Rahul-i, "Ni Jammu and Kashmir nung nübortem dang kanga pelar- Iba state nung India-i takok angubaji linük temzüngi takok anguba lir, democratic akhümtsübuba takok lir. Haryana nung meimlaba osang anguba ya onoki asadangdar. Assembly constituency aika nung tashishiba aliba ya onoki Election Commission nem metetdaksütsü," ta metetdaksü.

Haryana assembly election nung party-i tamakok nguaka Rahul Gandhi-i, "Haryana nung nübortem yariba atema ajak dang pelar aser party nung inyakeritemi meranga inyakba atema parnok danga pelar. Loktiliba nung temeden,

rongsenkettzüng temeden aser ochi atema onoki maneni raratsü. Onoki maneni nenok asoshi ola adoktsütsü," ta metetdaksü.

Haryana nung Congress-i tamakok anguba atema Rahul Gandhi-i ola kecha madokba atema BJP IT cell tongti, Amit Malviya-i Congress lenir Rahul Gandhi aitsüba sülen Rahul Gandhi-i item osang ya metetdaksü.

October 5 nü Haryana nung election tembangba sülen exit polls balala ajangabo Congress-i takok angutsü ta asadangteta liasü, saka BJP-i takok angu.

Haryana nung BJP-i menden 48 nung takok angu aser Congress-i menden 37 nung dang takok ngua liasü. Indian National Lok Dal (INLD)-i menden ana nung takok angu aser independent candidates 3-ia takok ngua liasü.

Ajisüaka Jammu & Kashmir nungbo tang mezüng INDIA teloktepi sorkar akümtsü. J&K nung National Conference aser Congress teloktepi menden 49 nung takok nguogo.



TIR YIMYIM YIMOBILEM (EDITORIAL)

DIMAPUR YANGTEPNÜ, OCTOBER (MONGPUTENI) 10, 2024

Anüolen Aor Telungjem

Nagaland anüolen ta asüba ya tang Chümoukedima aser Niuland na razüka moi aliba mapang akhi Dimapur district kübok aliba lushi indang jembir. Anungji, tangbo Dimapur, Chümoukedima aser Niuland district ta asütsü. Item district asem nung ya senso küma alir teret endoktsür pur Aor kibong meyrirjang tenembo alitsü südi. Aji oda, asenok mejungaka Tsüngremibo asenok dang taochi tulu sayua samatsü melen teimba-ang kümdakja renlokdahtsüogo. Anungji, asenok mapaji Nagaland anüodklen nungi soyapokyayonga aruba tang Nagaland anüolenang alima tuluba aser tajungba nung alitsüsa moatsüba Tsüngremer nükjidong aser taginüba angatetsü kanga nungdaker. Tajung aser tajangzük talila kaji, Nagaland anüolen district asem nung aliba ya asenok kija mejamejaa alir masü saka alima kin semersanger den külemi alir, anungji shisa tenük tuluba lapoka tangar inyaksangshi aser asenokia inyaktetsüba wadang tulutama reprangteter. Atangji, Nagaland anüolen alir Aotsür Aortema longjema lir aser pei asoshi dang masü saka tangar asoshia Aor kija, kibong, arogo aser loktitemi temeim aser tangatet mapa tajung aika inyakdagi. Ajisüaka, tanü tensa asenok asoshi dang masü saka tangar asoshi mapa tajung tuluba inyaktetsü atema Dimapur, Chümoukedima, Niuland Aor Telungjem sabang ka kanga rongdak nungdaka reprangteter. Iba sabang jagi mapang mapang shia sobaliba aser saisapong sentong tapu balala ayongzüka pei nübertem metetpeladaktsütsü, Ao oshi jembitsü aser asen sobaliba tajungtem yar tsüngsang aser kentenmenü balala nung shilem agidakja ajungshitsü. Iba amaji ka, tang aritepa meinyak nungbo 2080 küm tashi nungbo Nagaland anüolen Ao oshi jembir ishika dang akümtsü, anungji Aor benjongbentsü amongtsü mejangratsü aser Ao arogotema kanga azüngmeyaka akümtsü. Aji oda, Aor nütsüngbo aika saka Ao kinbo mali ta ataloktsü ana nung dang lir. Atangji, asüng ataloktsüba khen yutsür tanüa asenok nütsüng inba dang ashi tangari asenok mapa aika nung mezüngshir. Tatishitsü kaji, tawa Chümoukedima nung Nagaland police alidak Nagaland Home Department-i Dimapur, Chümoukdima aser Niuland nung tenteta aliba Naga nung lokti tentetem ajak jaoka Nagaland-i ozüng alema bendangertem aruba tebilemstütem indang shisalemsatepba senden ka ayonga liasü. Iba senden nung Ao kin nungibo Ao Senso Telungjem Chümoukedima jaokba dak alaka Dimapur aser Niuland district nungibo Aor lokti tentet shinga mejaok. Ajisüaka, tangarbo district asemprongla amshia külem Telungjem tenteta aliba agi Western Sumi Hoho, Western Sumi Youth Front, Chakhroma Public Organisation aser Western Chakhesang Hoho ama teloktem nungibo teshimtet pur nisung anana jaoka tang aser tarutsü asoshi Naga nung nungdakba tongtibang ken o lemteper senshiogo. Iba amaji Nagaland anüolen government-i nübertem asoshi nungdak ken o lemteptsü atema lokti senden ayongzükba aika nung asenok oagi asen bilemba süoka shisalemsateptsü asoshi asen kinbo maongka mangur, kechiyong tangari asenok züngshitsüsa asenok arok telungjem tenteta maka. Asenoki itemji süoki ia mebilemstüa akok saka asenok Naga nung tongtibang yimten onük benoka o lemtepdak asenok metentetbajibo takoksa tulu lir. Ashiko, iba takoksajibo asenok asoshi dang masü saka Naga nung songjen asoshi asütsüa akok. Ibaji asenok ajaki kanga süoki ia bilemstüla. Aji oda, Naga nung asoshisa asüyonga Nagaland anüodklen dang nungibo temoatsü dang masü saka tebilemstüa anüolen tuluba ajurur. Iba jagi mapang mapang shia Dimapur, Chümoukedima aser Niuland district asem nung alirtem telungjem senden lia o lemteptsüsa akümer. Iba ama o lemtepdakji district asemprongla atema district ka nung dang tenteta aliba telungjem kati mejembitettsü. Aji oda, Mokochung district atema mesüra Nagaland ajak atema jembitsü ayongba senden nungbo Ao Senden jaoktsü saka Nagaland anüolen aliba district-tem atema jembitsüba senden nungbo Ao Sendenbo mejaoktsüa akok. Iba tangatetba nung, Nagaland anüolen alir Aotsür-Aortem ajak Ao Senden aser Watsü Mungdang kübok telungjem mepilai tang amai alitsü saka ano anüolen atema Aor arok tentet ka kanga rongdak nungdaka reprangteter. Ibaji ano tang dang nungibo asügang tenüngdakba akümtsü.

OLEMSABANG

NOKYU MAJUNG METJI

~ P.Renthy Jamir.

Changtongya Town Baptist Arogo ita shi tershilem tenla kari meyiter karibo ter tema ta abener aika lir Ano meyi pungo trok ta tekübokba noklang pungo trok ta abener. Aser teti abenertem rongnung ishibaji amitsür ka Bendangsüngla lai sen 20 nungi 25 abener. La sensaker mokominer taküm saka kodanga meshimetsü masür. La tashi yari meranga inyaker. Sentepi teti aor tershilem shitak abener. Aor sobaliba tajung koba England nungeria junger ta angzüka benshi. Anungji la sabi saru ajak nung aioktsür. Kechiyong British governmentia mokominer milamitsürbo House tax (kajana) mab agüja aru. Saka asen Aor Baptist amangertembo telok temzüng asünungji lai ter shilem abenba nungjagia sen 20 abendang sen ka sen 25 abendang sen 1-25 ta agir. Tangbo labo süogo. Süra Aor Baptist amangertem rongnung karbo ABAM anemer ABAM sempar lidima? Nagaland nung NPSC tatidang result kodang adokdir Aor kwi lir ta tama ajidanger. Dimapur nung Gari tsüktepa nisung kar süogo tasüra Aor asü shir ta ratar. Anungji Aor telok kari Aor rongnung karbo ABAM anema tebilemba tamajung ali ama bilema lira aji tamashi lir. Saru jangko toker ajaki pei tebilemba shidangtsü temeden lir kati jang paoker mesür masüji tamangertem tsüngda amokmerentepa tashi ain sayuteptsü menüngdak ta bilemer. Senpak 20 nung koda sen ka atar yamaji tila tulu ajak pei temeden lir ta bilemer.

Asen Aor shin O ka nung kenü Tenembang kenü Pokpobang ta ashiba ama asenok ABAM küm aika temoatsü takokma nung Nagalima dang masü alima tesem aikalen tetushi ngua sentsü wangshia aruogo. Saka tia maka küm 150 Jubilee sullen NOKYU MAJUNG METJIA tamakok teraksa maaksü nungkobentet tulu tatalokbatem osang balala angashidang asenok ajak temulung shiranger. Joko amokmeren tsübuba agi osang zülurtem pei temeden shidangtsü temulung moluteti yaka mesüi moka lir.

Teraksa madak teraksa merokmi ama ka nungi ka ta aploka oa mungdang senbong lapoka senotsü tim mesüi lakh semer lir tapu tepleni oa tashionshiba osang angashidang ya sensaker milatsürla sen ka nungi shir sen 1-25 arokoshia menatenba ta temulung ayanger yamajisa shiti kolak aluper agi meküpbangtet ABAM tokoklaktem Hindu nung benjong nung temang rangben toli teploker alima dang sayubaji asenok nokyu majung metjibasa ta bilemer. Kechiyong lijabai ozü sobu alemnü waroi tashi mangai yamala toli nung pelephiba agi Aori Waroshi machir.

Metjia nokyu majung nungji, Tanü ozü lanurtem temesepba mim mozular tapuba sungra nungi piladakjang ta ayimtenba tialong mapang ABAM kübok ayuba Lai puti bushidak mongchen kong temeshitet lanur noklang aika sendena lai puti angazüker alima kin ajak dangi aotsü renemshir, iba meshiteta mekazüka ayuba atsü telung nunga yob tendak Tsüngrem chirtem kibuba madangi ajuruteptsü arudang satana pungsemer aru ama shi mekatsü atena mongin mim mozü shibelener (drug lord, king pin) tetsüdi aita liasü ta angashiba osangjia alima tsüngdang naro anurbo masü ta bilemer. Yamajisa Ijip lima nung mezüng asoba chir tama tepset ama ABAM kübok arogo tulutiba nung temeneni mapa inyaka sen crore asem pezü taolen memetet ta asüba tatalokbajia osang tajung tanganütsübo masü. Yamala arogo aika nung ano temai matokba osang jenti lir. Ano temeim agi miimbangtsüba aika lir.

Nokyu majung miyong züa toktet nungji ABAM kübok mangatettepi aliba ken O tatem küma yimjung lapoktsü tamangtir mangdang ain akartem mongin takotet nisung 15 shimtetja yimjung bener arutsü nübur ajaki sarasadema yongyasetata. Saka tia maka tasemlen mebenoktsü parnoki yimjung bener marutet. Yimjung atema item nisung 15 yagi kwiben parnok temokok agi tsükiter nüktzusa nüktzü yimtoka Nehimia ama "ne tenzükeri sarasademba angashitsüsa yimlibilema ne tenarong tenangma aser ne tenük lapokjangma" ta sarasademer alitsü. Saka nüburtemi memoa parnok sarasadem yinzü tokdang kotak metongi Baal tsüngrem dang ayimtenba ama dang liasü. Kechiyong asenok Nokyu majung metjia lir. Sünglang tatem atener temejakokdak maka joko shisa tatem SETTLEMENT committee ka tamangtir Lai puti meteterter aser alima bangdak ozüng amer takotet mongin nisung 9 shimteter tang yabo ta nübur ajaki mulung lemjalema mapa nongloktü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UK nung Religious Freedom ketdangser tasen ka shimtsü mepishi



Fiona Bruce

October 09, 2024: Khristan lenirtemi UK nung sorkar ketdangsertem dang freedom of religion atema ketdangser tasen ka shimtsüla, ta takhangba agütsü.

Taoba mapang UK nung Conservative MP, Fiona Bruce taküm July ita tashi freedom of religion ketdangser liasü, iba sülen sorkari tang tashi la melen meshimer.

Khristan melungtet telok Christian Solidarity Worldwide (CSW) tentetsang aser Tir, Mervyn Thomas-i, iba tebilemtsü atema Foreign Secretary David Lammy aser UK Freedom of Religion or Belief Forum (UK FoRBF) den lemsatepdar, ajisüaka tang

tashi parnoki telangzüba magütsür, ta metetdaksü.

International conference mapang nungji UK nungibo religious freedom nungi ketdangser malitsü, ta parnokisa metetdaksü.

UK FoRBFF nunga chair, Mervyn Thomas-i, "Tang tashi ketdangser meshimba atema ni kanga mepelar. Sorkari ketdangser shimtsüla, aser tongtibangtibaji taruba hopta Berlin nung freedom of religion ministerial conference nung UK nungibo ketdangser malitsü. Iba ya tejashitsüka lir, kechiyong 2019 küm nungi tenzüka asenoki ministerial conference ajak nung shilem agia dena aruogo. Sorkar tasen tentetba sülen religious

freedom ketdangser shimtsü atema sorkari rongdak süa meinyakba atema ni kanga mepelar," ta metetdaksü.

"Kü den tangar aikati kanga rongshia aruogo. Onoki David Lammy danga iba atema kanga rongdak süa inyaksüla ta mepishi, saka tang tashi mataloker," ta pai metetdaksü. Bishop of Winchester, Rt Rev Philip Mounstephen-ia, iba ya maaksü tuluka lir, kechiyong UK-i inyaka aruba mapa tajungtem samar, ta ashi.

Mervyn Thomas-i, Berlin nung ayongzükba senden nungji Foreign Office nungi staff ana dang adentsü saka parnokji yimsü temeden onüktem nung mongintem masü, ta metetdaksü.

USCIRF-i Algeria nung yimsü temeden anema inyakba metetdaksü

Washington D.C, October 09 (Agencies): United States Commission on International Religious Freedom (USCIRF)-i Algeria nung yimsü temeden indang report metetdaksüogo.

Iba report ajanga ashiba agi, Algeria nung sorkari Tsüngrem mezügmeshiba ya ozüng alema inyakba ama züngshir aser yimsü benshiba aser tekülem sentong agiba nokdangar.

"Sorkar ketdangsertemi Khristan aser Ahmadiyya Muslim nung teloktem anema inyaker. Algeria sorkari Muslim nung ama register asütsü atema Ahmadiyyas nung nem temeden magütsür aser maneni yimsü lenirtem anema inyaker. Sorkar ketdangsertemi linük nung evangelical Arogo ajak amai shibangtsüogo aser taküm September ita tashi nungbo linük nung Evangelical Arogo ka dang anünga lir," ta USCIRF-i metetdaksü.

2024 Annual Report nung USCIRF-i U.S. Department of State dang Algeria ya tanaben "Special Watch List" (SWL)

nung züngoktsüla, kechiyong sorkari yimsü temeden anema mejungi inyaker, ta metetdaksü.

U.S. Commission on International Religious Freedom (USCIRF) ya federal sorkar indang nija tentet ka lir. Iba telok yagi aliba tesem balala nung yimsü temeden jenjang asadanga sorkar nem report agütsür.

USCIRF-isa US Tir, Secretary of State aser Congress den alima tesem balala nung yimsü nung ajemdaker reshikangshiba nokdangtsü aser yimsü temeden ajungkettsütsü atema tebilemba onüktem lemsateper.

Taküm May ita nung USCIRF-i US State Department dang tamangba yimsü temeden anema inyakba atema linük 17 Countries of Particular Concern (CPC) nung züngoktsü atema benoka liasü. Linük 17 ji Afghanistan, Azerbaijan, Burma (Myanmar), China, Cuba, Eritrea, India, Iran, Nicaragua, Nigeria, North

Korea, Pakistan, Russia, Saudi Arabia, Tajikistan, Turkmenistan aser Vietnam linüktem lir.

Alima nung yimsü temeden dak sendakba nung osang renema US state Department nem metetdaksütsü atema International Religious Freedom Act of 1998 (IRFA) ajanga USCIRF ya jurila commission ka ama tentet.

Küm shia United States Tiri tamangba yimsü temeden anema inyakba linüktemji Countries of Particular Concern (CPC) nung züngoker. US State Department-isa yimsü temeden anema inyakba linüktem Special Watch List (SWL) nung züngoker.

Iba dak alia State Department-i yimsü temeden anema inyakba teloktem Entities of Particular Concern (EPCs) list nung züngoker./

Item ama linüktem shima sangdongtsü atema küm shia USCIRF-i report renema state department nem agütsür.

ANOGO ABEN TSÜNGREM DEN

Tetsübu Temoatsütem

- T.Ken 128:1-6.

Tekong 3 nung kija timatempa indang ashiba angur. "Alu alirtemi kü rungdong manung alu ala; parnoki meritsüng talang yanglu". Kija taküm kangshiba noksa aika Laishiba nung angur: Tzüyim yipru ajangba mi tesashi ajangba, tongpang rara ajangba aser khuret abenba. Kechiba ken züluri alu alabaji kija timatempa noksa ama amshi?

Mapa kaji, nüburtemi paji jana amshir ta ken züluri bilem. Parnoki ashi, "Na alu nung jana ama lir, aser onoki iba alu onsatsü, aser nai kechi bilemer onoki au ta mali". Asenoki Yisu asoshi lira, nüburi Pa amshiba ama asenoka amshitsü ta bilemang. Parnoki Pa jana-rüja ama amshi.

Iba noksa ochiba teyongtsüji alu alibaji alu rutsü asoshi lir. Kodang nüburi na jana ama amshidir, tai bushiba ne rungdong nung alenlokdir aser taittsüba agi ne rungdong tusadir, ya bilemtetang; alu rutsü asoshi Tsüngremi na renemtsüdagi. Kechi koma aluruba? Ibaji nai aremba metsü dak aket. Nai mang ayangba, tesempatep, tenük merem, mokok aji metsü remra alu rubaji taku asütsü. Saka nai Tsüngrem o metsü remra, temeim aser yimjung aser taremsük agi ne mulungjang nung yimsü sūdaksüra, na ken zülur den Kibubaji Temeshi lir ta shitettsü- Pai iba tebilemtsü bentettsü. Idangji tekong 8 nung ashiba ama, alurubaji temoatsü ka alitsü: "Kibuba temoatsü nenok madak liang; Kibuba tenüng nung onoki nenok moatsür".

Ne taküm nung nai alu ruba ka kanera nai ali tusatsüla, atemtsüla aser tzü aintsüla. Koang nüburi na jana ama amshidir, kodang alu alaba ama ne taküm tetendangbaji alu alaba ama ne taküm ajanga odir, alu rutsü asoshi renemang. Tanü Tsüngremi na asoshi temoatsü alu ruba ka yutsür, anungji metsü shidak yoktsü bilemtetang.

Israel-Gaza rara menokdangtetba atema Pope Francis-i lenirtem aitsü

October 09, 2024: Yaküm October 7 nü Hamas teloki Israel amakdang nisung 1,200 dak tema tepsetba aser aika puer aoba mapang nungi tenzüka Gaza nung Hamas aser Israel na tsüngda rara tenzüker joko küm ka ajangba mapang nung Pope Francis-i iba rara ajangba kongshia timtemertem atema pai aria bilemtsüba lemsatep.

Pope Francis-isa iba region nung yimjung alitsü atema ken o jembitsü ayongzükba den külemi iba rara menokdangtetba atema alima nung lenirtem aitsü.

Paisa, yaküm Hamas teloki Israel amakba mapang nungi tenzüka region nung rara prokshir, saka alima linüktem aser tashi tulu aliba linüktemi raraba hadir menokdangteter aser rara menokdangteter, ta metetdaksü.

Pope-i, tashi tulu alirtem ajangba tilartem takoksa angur, talisa tashi malir tamangertem meketa lendong liaka parnoki temeshi lima nungi mainshir, ta

metetdaksü. Paisa, "Ni nenok asoshi bilemtsür aser sarasademtsür," ta ashiba den külemi yimjung metsüh prokang aser tashiyim mamshiba yimjung tashi kuli süang, ta ayongzük.

October 7 nü alima tesem balala nung Catholic Khristantemi lumia sarasadema mongogo.

October 7 nü yimjung asoshi lumia sarasadema amongtsü atema Pope Francis-i tayongzükba agüja liasü. Roman Catholic Arogo nung tekolakbai Synod indang General Assembly session tanabuba tenzüka St. Peter's Square nung tekülem agiba sülen October 7 ya lumia sarasadema anogo ka asütsü, ta sangdonga liasü.

Iba mapang nungji Pope-i, "Raraba mopung aser azütokshiba mi ajangba maneni nüburtem aser alima ajunga anokshitsüba mapang ka nung Khristantemi timtem ajangshiba meimchirtem tenzüksüla," ta ajangzüka liasü.

AO OSHI ANGAZÜKDAK:



Tantsür

(n) tetsür kanga tain (old lady)

* Ojala tantsür kümer junga dang liasü.

Tantsüti

(n) tetsürtem rongnung arishi küm teimtiba tetsür (oldest woman)

* Arogoi yimtak tantsüti nem sempet ka agütsü.

OLONG PAITEP # 6948

Grid for OLONG PAITEP # 6948 with numbers 1-17 in various cells.

TIPIEN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6947 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Bhubaneswar nung Kalinga Institute of Social Sciences (KISS) Volleyball Foundation Festival nung otsü tasen ka yangluogo. October 4, 2024 nü volleyball exhibition match ka nung asayar teimtiba atema Guinness World Record ka yanglu. Iba asaya ya ghonda 8 tashi asaya aser asayar 430-i shilem agia final score 736-756 liasü. KISS Volleyball Foundation Festival ya FIVB Volleyball Foundation aser Kalinga Institute of Industrial Technology (KIIT) külemi yaritepa ayongzük.

Manipur nung dengue agi nisung 3 asü; 1,439 dak putet

Imphal, October 9, 2024 (Agencies): Manipur nung taküm January nungi tenzüker October 9 tashi nung dengue ajanga nisung 3 süogo aser 1,439 shirang ta state health department-i metetdaksü. Imphal West aser Imphal East district tem nung dengue teimba putet aser district ana nung nisung 700 tema dak puteta liasü. Regional Institute of Medical

Sciences (RIMS) aser Jawaharlal Nehru Institute of Medical Sciences (JNIMS) hospitals nung shirangertem anioka anepaluba ajanga state malaria department ketdangsürtemi osang tejangja meteta aküm. Maneni, Bishnupur, Thoubal aser Kakching district tem nunga nija mozü kitem nung dengue agi shirangertem anepaluogo.

Ajisüaka hill districts nungbo dengue putetba osang mali ta Imphal East district malaria officer T Nepolian-i ashi. Dengue noktangsü atema state malaria department-i Keishamthong, Keishampat, Sega Road, Haobam Marak, Lalabung, Uripok, Lamphel, Thangmeiband, Khurai Telipati aser Bamon Leikai dena tesem 60 tashi nung mapang shia fogging südar.

Tripura sorkari tribal council atema Rs 30 crore lemezüksür

Agartala, October 9, 2024 (Agencies): Tripura sorkari Tripura Tribal Areas Autonomous District Council (TTAADC) nung mapatong 6 inyaksü atema Rs 30 crore lemezüksüogo. TTAADC kübok healthcare, infrastructure aser education renloksü atema item mapatong inyaksü. "State sorkari lisopurtem atema bilemetsür aser development schemes balala kübok senotsü lemezükja alir" ta Chief Minister Manik Saha-i ashi. "Sixth schedule areas nung infrastructure, livelihood,

education, healthcare renloksü aser lisopurtem tiptema lidaktsütsü atema sorkari inyaker" ta pai ashi. Rs 30 crore ajanga healthcare, education aser infrastructure renloksü ta CM Saha-i ashi. "Chief Minister-i onok nüngdakba kar angashiba aser iba lemtet agiba atema pelar. Terenlok atema senotsü melira TTAADC ketdangsüa aotsü tasak lir" ta Tipra Motha founder Pradyot Kishore Manikya Debbarma-i ashi. "March 4 nü Tiprasa accord sign asüba sülen TTAADC nem senotsü lemezüksüogo. Ajisüaka

state nung tebilemetsü aika lir aser iba nung tawa tüzümsüng ajanga teraksa bentsür aruba dena lir. Tüzümsüng ajanga teraksa jenti bentsür aruogo aser state sorkar o TTAADC timtemer" ta Pradyot-i ashi. Pradyot Debbarma-isa Centre sorkar dang teyari meshiogo. "India sorkari ozü state nem special status agütsütsüla aser TTAADC o Non TTAADC areas asoshi sen lemezüksütsüla" ta pai ashi. "Tripura ya Bangladesh den arrtsütepa aliba state ka lir anungi Centre-i temulung agütsütsüla" ta Pradyot-isa ashi.

Assam engineer-i sen tim mesüi amshiba aser absent asüba atema anentsür

Guwahati, October 9, 2024 (Agencies): Assam Governor-i Assistant Executive Engineer Sudip Sarkar mapa nungi anentsüogo. Pa ya Karimganj nung Lowairpoa Development Block nung inyaka liasü. Baghan Gaon Panchayat, Medly Gaon Panchayat aser Putini Gaon Panchayat nung Finance Commission Grant tim

mesüi amshiba aser ozüng alema mapai maruba nung ajemdaker Assistant Executive Engineer mapa nungi anentsü. Sarkar-i bangdakpur dang nungi temelaba magii November 2022 nungi mapai marur ta Commissioner of Panchayat and Rural Development, Assam-i ashi. Assam Service (Discipline & Appeal) Rules, 1964 nung

Rule 6(1) nung lateta aliba ama Sarkar-i November 1, 2022 nungi mapai maruba nung ajemdaker anentsü. Sarkar mapa nung anenja aliba mapang applicable rules nung lateta aliba ama subsistence allowance angutsü. Pa headquarters nung dang alitsü aser bangdakpur dang nungi temelaba magii headquarters toktsür maotsü.



Tripura nungi drug shibelener nisung ana Karimganj, Assam nung apuba sülen agiba noksa angur. Rs 8 crore alang Yaba süngjang bener arur ta osang angazükba sülen police-i Assam-Tripura arrtsü anasa truck gari ka mita reprangdang Yaba süngjang 80,000 bena aliba ngutet. Iba dak sendakba nung police-i Tripura nunger Tinku Malakar aser Sujit Deb na apu.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA No.DHFW-5-23/TRG-NSG/2022/8330-31 Dated, Kohima, the 9th Oct' 2024 NOTIFICATION This is to notify that the declaration of result for selected candidates to undergo GNM & FHW/ANM training for the Academic session 2024-25 is uploaded in the Department website www.nagahealth.nagaland.gov.in and also in the notice board of the Directorate of Health & Family Welfare, Nagaland, Kohima. D.R.E. MOTSUTHUNG PATTON Principal Director Directorate of Health & Family Welfare, Nagaland: Kohima.

South Korea den lenmang ajunga shibangtsü: North Korea

Pyongyang, Mongputeni/Oct. 09 (Agencies): North Korea indang army-i South Korea-i aoba lenmang aser railway ajak shibangtsü aser par arütsülen sepaitem yoktsü sangdongogo, ta state media ajanga ashi.

Korean People's Army ajanga South Korea den sendaktepba lenmang aser railways ajunga shibangtsü aser ozü tsütsü nüngdakba tesem nung defence structure tashi tait yanglutsü ta Bodhbarnü ashi, ta

official Korean Central News Agency (KCNA) ajanga ashi. Ibai yimya ka dang amai ajitetter, kechiaser linük ana tsüngta arütsü alema senzüsempogba ya küm aika jakdang nungi anena lir.

South Korea nung war exercise agiba aser United States indang 'strategic assets' temi mapang shia region semdangba asoshi telangzüba agütsür lir, ta army temi ashiba KCNA nung sangdong.

South Korea indang Ministry of Defence ajanga iba osang US-i anir aliba United Nations Command nem sangoktsüogo, ta sangdong ka nung ashi. United Nations Command ya linük balala nungi adenshiba mitkartem lir aser parnoki Korea linük ana tsüngta Demilitarized Zone (DMZ) inyakyim ketdang asür, kechiaser technical tsütsü linük ana ya tang tashi rara nung lir.

(Maneni tapak 8 nung...)

US asoshi tsükchir tulutibaji Iran lir: Kamala Harris



Washington, Mongputeni/Oct. 09 (Agencies): Tehran-i tawa ballistic missile amshia Israel amakba athishia, Iran ya United States asoshi tsükchir tulutiba lir, ta US Vice President Kamala Harris-i ashi.

CBS television network den sensaksema Hombar aonung sayuba nung Democratic telok nungi US tir candidate-i ashiba agi, US asoshi tsükchir tulutiba linükji koba asütsü ta asüngdangra Iran asütsü.

"Iran nung teka nung America nung azü lir - Israel dak ballistic missiles 200 amshia amak," ta lai ashi.

"Iran kodanga nuclear tashi melidaktsütsüsa asenoki inyaktsü nungdaker. Aser ni atema teinyaktsü mapa mezüngbubaji aji asütsü."

Taoba hopta Iran-i Israel

tesem balala nung missiles tem khaloktsü, koba Tehran nung Hamas tanishir Ismail Haniyeh tepsetba aser Beirut nung Hezbollah lenir Hassan Nasrallah den Iranian general tem tepsetba asoshi tayang kepzüka lir ta ashi.

Gaza nung rara tuluba akumba mapang US asoshi tebilemstü tulutibaji Middle East ya akumer ta Harris-i jembiba nung angateter.

Küm ishika US ketdangsür temi China dak temulung agütsür toktepa aru.

2022 küm Pentagon-i Chiba ya US asoshi "pacing challenge" lir ta sangdong, tetetzü tarutsü nung timtem keta lir.

Iba küm White House indang National Security Strategy nung Beijing den toktepa ya Washington asoshi "most consequential geopolitical challenge" lir ta shia liasü.

Russia-i Ukraine amakba ya US asoshi tebilemstü tulu liasü, shiri Kyiv nem mitkar aser senotsü teyari agütsür aser Moscow nem tenokdangba balala agütsü.

Ajisüaka Middle East nung

azüdokshiba ajanga US sorkar-i Iran aser par tembar Israel dak rangloktüsüa akum.

Iran-i nuclear nok-nü yangluba nungi nokdangtsü atema mitkar tashi amshitsü asü ta asüngdang dang, tang arsanga iba indang mejembitsü, ta Harris-i ashi.

Iran-i nuclear nok-nü mebushir ta ashir, saka iba linük indang nuclear sentong tejakleni aor.

2018 küm taoba US tir Donald Trump-i linük balala den külemi tezüngzüktep ka yanglua aliba agien, koba ajanga Iran-i nuclear sentong ajemdaktsü aser iba melen US-i tenokdangba agüja aliba agiena liasü.

US Tir Joe Biden-i iba tezüngzüktepji repringshitsü nangzüka office-i aru, saka Iran ketdangsür den aiben jembishinüaka iba tezüngzüktep mapa kuma meinyaktet.

Aser Biden administration-ia maneni Trump mapang agütsüba tenokdangba benoka liasü.

Yamaji lia Gaza nung rara tenzüka ajanga tensa tali tamajungba akum.

Scientists asem-i Nobel Prize in Chemistry sempet angur

Stockholm, Mongputeni/Oct. 09 (Agencies): Scientists David Baker, John Jumper aser Demis Hassabis nungeri takum yangluba, proteins indang yimya takzütetba asoshi 2024 Nobel Prize in Chemistry takok nguogo.

Royal Swedish Academy of Sciences ajanga Bodhbarnü sangdong ka nung sempet tesadang ka Baker nem agütsütsü aser tesadang ka Hassabis aser Jumper nem agütsütsü ta ashi. Baker-i "computational protein design" yanglu aser Hassabis aser Jumper nati "protein structure prediction" ngutet.

Nobel Committee for Chemistry indang mendenpuba, Heiner Linke-i ashiba agi, scientists temi mapang talangka nungi proteins indang 'three-dimensional structure' ngutettsü mangdang liasü.

2020 küm Hassabis aser Jumper nati artificial intelligence kanga junga amshia code bushitet. Parnoki itemji amshia tongtipang protein indang structure tepenja bushitet, ta Linke-i ashi.

"Scientists temi ano asen nüngdakba nung nature indang hadir balala amshitsü atema proteins tasen yanglutsü angazüknüa liasü. Iba tebilemstüji David Baker-i koktet," ta pai ashi.

"Pai computational tools yanglutet, aser tangbo ibaji ajanga scientists temi proteins tasen yangluteter, anungji meimchir asoshi zünger mezüngma takoktsü lenmang lapoktsür."

Baker ya Seattle, United States nung aliba University of

Washington nung inyaker aser Hassabis o Jumper na Google Deepmind indang artificial intelligence lab, London nung inyaker.

Parnoki computing aser artificial intelligence (AI) amshia proteins indang 'secrets' jangjatet aser chemists temi mapang talangka nungi takum asoshi chemical tools - proteins junga angatetnüa liasü, ta committee ajanga ashi.

Hassabis aser Jumper nati parnok indang AI model AlphaFold2 amshia nisung dak aliba proteins ajunga indang structure asadanga liasü. Parnoki alima nung aliba takumsangnu asadanga mapang ngutetba 200 million proteins ajunga indang structure takzütet, ta committee-i ashi.

Parnoki ngutetba ya ulura aser tesümgangtsüka lir aser iba ya ajanga vaccines tekeraba nung yanglutetba aser chemical industry tajungba kumdaktsüba densema meimchir ajangzüka applications aika yanglutettsü, ta ashi.

Taoba küm iba sempet ya Mounji Bawendi, Louis Brus aser Aleksey Ekimov nunger nem agütsü, shirnoki quantum dots ta ajaba atoms indang slusters tila ngutet, koba tanü flat screens, light emitting diode (LED) lamps aser surgeons temi komo nung azü tenzü ajitettsüsa osettem yangluba nung amshir.

Iba award nung senpet sen 11 million Swedish kronor (\$1m) agütsür, koba Swedish inventor Alfred Nobel indang senmang nungi agütsür.

WORLD MENTAL HEALTH Day 10TH OCT 2024

MAPA INYAKBA TESEM NUNG MENTAL HEALTH ASOSHI TEMULUNG AGÜTSÜTSÜ MAPANG TONGOGO

- HEALTHY WORKPLACE = TEKOLOK SÜNGJEMA & JUNGAALIBA!
- MAPA INYAKBA TESEM NUNG MENTAL HEALTH NUNG TEMULUNG AGÜTSÜTSÜLA
- MAPA INYAKDAK MEJUNGRA, MAPA INYAKER TAJUNGA MENENTSÜR
- TIMTEM MAPANG ANGATETTSÜLAASER YARITEPTSÜLA
- MAPA INYAKER ANEMAALITSÜ ATEMA SENTONG TAJUNGALITSÜLA
- MAPA INYAKER AJUNGTSÜ ASOSHI INYAKBA AJANGA MAPA NUNG TAKOK ANGUR
- MENTAL HEALTH ATEMA OLAADOKTSÜLA - YARITEPTSÜLA ASER MEZÜNGMESHİ MASÜTSÜLA
- TEMANG ANEMA ALITSÜ AJUNGMESOTSÜLA: MAPA INYAKBA TESEM NUNG TEMANG ANEMA ALITSÜ MAPA INYAKTSÜ AJUNGMESOTSÜLA

Further Info: District Mental Health Program, District Hospital

Follow us: @NagalandNhm | nhmnagaland

For any consultation on Metal Health Issues dial toll FREE 14416

5 Buba W.Nokdenlemba Open Volleyball Tournament asayadagi



5 Buba W.Nokdenlemba Open Volleyball Tournament tenzükba sentong nung tetushi tesemdang Nagaland Legislative Assembly Speaker Sharingain Longkumer, AKM lenirtem aser organizing committee pur külemi tangokba noksa.

Mokokchung, Mongputeni/Oct 09 (TYO): Ao Kaketshir Mungdang-i (AKM) ayongzuka Multipurpose Sports Complex, Mokokchung nung tanü nungi tenzuka 5 Buba W.Nokdenlemba Open Volleyball Tournament asayadagi.

Tanü iba sentong nung tetushi tesemdang Nagaland Legislative Assembly Speaker Sharingain Longkumer-i jembidang AKM tenzük Nokdenlemba tenü nung iba asayamung ayongba ya mapa kanga dang tajung ka atongtetogo ta AKM tenünsanga ashi.

Paisa nisung ka nem takum alidang tetushi agütsüba kanga dang tetemsü aser ano sür kelenasür nemji tenünsanga agütsütsüji tetemsü, saka iba

ama tenünsang ngutettsüsa aikatibo meliteter saka Nokdenlembaibo pa taküm alidang pai junga litetba agi pa taküm meliaka alimai pa nem tetushi agütsür ta asür Nokdenlemba tenünsanga ashi.

Sharingain-isa asayar telok nung asayar shia pei külem medemsor den yaritepa ajungshitepa asayatsüla aser külem asayartem den tanela ka nung angatettepa asayatsü kanga dang nungtaker, ta ashi.

Takokertemi mera tasen agishir ano temaba jenjang nunga shilem agitsü mangdang ayutsüla aser tamakok angurtemia khen tamakok anguba nem mekokdaksü asayar ka ama maneni tali tejangraba nung temulung agüja asayatsüla, ta asayartem ajungshia ashi.

Iba sentong nung Tsüngrem taochi lenisüba jazüka MTBA Pastor Rev. P.Chuba Jamir-i sarasadem aser Asungba-i ken tajung ka tena sentong meraketdaksüba den Organising Committee züngsem Imsüyanger-i tarur pela agizükba o jembi aser Kr.Moamongla Imchen lenisüba nung sentong ketdangsüa agia liasü.

Iba tournament nung team 10 shilem agidagi, aser Champion nem senpet sen 100,000, Runners Up nem senpet sen 50,000 aser Semi Finalist shia nem sen 20,000 agütsütsü. Iba den Best setter nem sen 10,000, Best Spiker nem sen 10,000, Best Libero nem sen 10,000 aser Player of the tournament nem sen 10,000 agütsütsü.

Kohima nung 6th Women's Basketball Tournament tenzükogo



Kohima, Mongputeni/Oct. 09 (TYO): Vision Trinity Club ajanga "Start unknown, finish unforgettable" omen nung ajemdaker St Mary's Cathedral Higher Secondary School, Lerie, Kohima nung ayongzükba 6th Women's Basketball Tournament nungi Meghalaya nungi team ka densema team trok shilem agitar.

Parnokji Meghalaya nungi defending champion Orca aser Nagaland nungi Elite, Touch Line, LFS, Loyala aser Artemis alitsü.

Iba asayamung champion nem senpet sen 35,000 den running trophy agütsütsü, runners-up nem senpet sen 20,000, Most Valued Player nem senpet sen 5,000, Late Vikeduo Memorial Award sen

5,000, Most Disciplined Team nem senpet sen 3,000 aser Best Team Jersey nem senpet sen 3,000 agütsütsü.

Asayamung tanü MLA Dr Tseilhoutuo Rhutso-i tenzüksü aser Hokulbarnü tembangtsü.

Dr Rhutso-i asayamung tenzükja jembidang, iba asayamung ajanga nüburtem tsüngta telungjem aser tangatettep tali bener arutsü imlar, ta ashi.

Sorkari tetsürtem jenjang ajungkettsü aser maongka kasa agütsütsü atema inyaker aser tang sisapong süshia, shisaliok nung süshia tetsür temi tajungba shilem agir, ta pai ashi.

Paisa iba asayamung nung point anguba ya telungjem asoshi aser three-pointer ya ajak sako asoshi südaksüner, ta

ayongzuka liasü.

Sentong nung Rokongunuo Zashümo menden liasü aser Sister Anit, Vice Principal, St Mary's Cathedral HSS ajanga sarasadema sentong tenzük aser Vision Trinity Club tir Nunese Sale-i pela agizükba o jembia liasü.

VTC sports secretary Luokeyezo Suohu ajanga asayartem tenangzükba agidaksü aser Destitute Home nungi tanur temi temeja ken ka tena liasü.

Mezüng anogo Orca-i Elite madak takok angu, Touchline-i Artemis akok aser Orca-i LFS madak takok ngua liasü.

October 10, 2024 nü Touchline vs Loyola, Elite vs LFS aser Artemis vs Loyola asayatsü.

ATP Shanghai Masters: Sinner o Medvedev na quarter asayatsü



Shanghai, Mongputeni/Oct. 09 (Agencies): Bodhbarnü pei tata asaya nung straight-set agi takok anguba sülen world number one Jannik Sinner aser Daniil Medvedev na Shanghai Masters quarter-finals asayatsü.

Sinner-i tejen yimya kar amshia America nung Ben Shelton madak 6-4, 7-6 (7/1) agi akok aser Medvedev-i Greece nung Stefanos Tsitsipas madak 7-6 (7/3), 6-3 agi koka liasü.

Shelton ya rank 16 buba nung lir, aser pai taoba küm kasa stage nung Sinner tsükdaksü, saka Bodhbarnü asaya tetenzük nungi Italy nungbai temulung lemteta asayaa minute 88 buba nung takok angu.

"Iba asaya kanga tasak liasü, aser nai pa den asayadang nai kangabo mazüokteter... Ni tasü ita asayatsü merang," ta Sinner-i ashi.

World number 5 Medvedev aser Tsitsipas na 14 ben buba asayar liasü.

Tsitsipas-i set tanabuba nung tashi ita tenzuka mezüng game akok, saka Medvedev-i pezü buba aser ti buba nung takok ngua temaleni atu.

Medvedev aser Sinner na taküm asayamung balala final stages pezüben tashi nung ajurutepa lir.

Sinner-i Miami indang semi-finals, US Open quarter-finals aser Australian Open final nung Medvedev madak takok ngua lir, saka Wimbledon nung last eight asayadang Russia nungbai Italy nungba teimla samatsü.

Kasa asayamung quarterfinals atonger ya world number 2 Carlos Alcaraz-a lir, shibai hopta ka tejangdang China Open final nung Sinner akok.

Arishi küm 21 tain Alcaraz ya asayar tejen Gael Monfols den asayar 6-4, 7-5 agi akok.

Arishi küm 38 tain France nungba yagi August ita Cincinnati nung Alcaraz madak takok angu.

"Iba asaya akokba atema ni kangasa pelar aser asaya tepiyong ni süngjema asaya. Gael den asayatsü ya temela masü. Nai ball ajak nung rangloksü nüngdaker," ta pai ashi.

Bodhbarnü ano Shanghai asayamung pezüben koka alisang Novak Djokovic aser world number 3 Alexander Zverev nungera asayatar.

BENDANGLI OSANG : Tapak 7 nungi... South Korea den lenmang ajunga shibangtsü...

Linük ana ya armistice nung meyongnem agütsütepa 1950-1953 Korean War tembang, saka ibai yimjung asoshi tezüngzüktep masü.

North Korea-i mitkar kanga sashia yoka aliba arütsülen taküm ita aika landmines aser barriers inoka arur, ta South Korea indang mitkari taoba mapang shia liasü.

Mera tasen yagi Korea linük ana tsüngta mangatettep tuluba akumba sayur, aser North Korea indang army temi sangdong ka nung pei sasa pei kumzuka ayutsü asoshi inyaker ta ashi.

Tsükchir sepaitem raratsü tebilemba nung yimya tamajungba akumer aser US mitkar dang iba inyakyim indang rateta ashitsü osang agütsüogo, ta ashi.

Korean Peninsula nung

tena ya tangsa tamajungba lir, aser Pyongyang-i nok-nü aika tendanga arur. North Korea-i Mongulbarnü long-range artillery system ka tendangogo, ta KCNA ajanga ashi.

Korea linük ana lungiemtsü asoshi nükjiong yua aliba agiena South Korea ya tsükchir linük ta sangdongtsü atema constitution yanglushitsü imla aliba mapang ka nung iba osang ya sangdonger.

North Korea lenir Kim Jong Un-i January ita totuyuba agüja aliba ama Supreme People's Assembly nung constitution nung temelenshi yanglutsü imlar, koba Bodhbarnü atemtsü.

Par linük nung defence minister tasen, No Kwang Chol shimogo, ta KCNA-ibo sangdongogo.

BILEMDANGANG
"Memerangdangi toktsüba ya tashimait tulutiba rongnung ka lir."